

NUNARSUAQ TAMAKKERLUGU ATUARNEQ 2022

ATUA RAKET

BOLIVIALIARPOQ



GLOBAL CAMPAIGN FOR
EDUCATION
www.campaignforeducation.org



OXFAM
IBIS

SAQQAANI ASSEQ
Carlito saniliillu Denis
Amazonasimiittumi
Batrajami najugaqarput.
Qupp. 8-mi allaaseri-
neqarput.



Oxfam IBIS nunat tamalaat
anguniagaata 4-p
eqquutinneqarnissaanik
qulakkeereqataavoq meeqqat
tamarmik atuarfimmi pitsaasumi
atualerniassammata. AtuaRaket
atuarnertigut tamatumunnga
ukkasseqataatitsissaatit.



ATUA RAKET

AtuaRaket 2022-mut tikilluaritsi / **4**
AtuaRaket Bolivialiaqatigiuk / **6**

NUKARLIIT

Carlitop orpippassuarni orpiit nalunngeqai / **8**
Orpiit pikititsinerat Mette Vedsøp oqaluttualiaa / **22**
Bibosimik Motacúmillu oqaluttuaq / **34**
Lisethip kakaoit mamarinerpaasarai / **38**

ILIKKAGAQRNERUGIT PEQATAALLUTILLU

Meeqqat AtuaRaketimiittut Bolivialu pillugit
paasissutissat / **50**
Nunat anguniagaat ukkataralugit / **51**
Sapaatip akunnera sunniinarfik 2022
peqataaffigisiuk / **52**
Ukioq manna katersiniarnermut peqataagisi / **54**
Rhoda Jenniferilu atuartunit allagarsisut / **56**
Liseth Luis Alfredolu allaffigisigit / **57**

AKULLIIT

Jorge Luisip piratfiskit mamareqai / **58**
Suna tamarmi sioraannangormat Søren Jessenip
oqaluttualiaa / **66**
Delia Carlosilu: Silap qanoq innissaa eqqoriarneq
ajornartaqaaq / **78**
Illampumik, Huayna Potosimik Mururatamillu
oqaluttuaq / **86**
Luis Alfredo: Kiattup orpippassuisa qeqqanni
illoqarfik / **88**
Orpimmik toborochimik guutimillu Kolibrimik
oqaluttuaq / **96**



ATUARAKET 2022-MUT



Ukioq manna AtuaRaket Amerika Kujallermiittumut Bolivialiarpoq – nuna takisuunik kuulik, portusuunik qaqqalik, nillataartunik qatsissortalik naggorissunillu kiattut orpippassualik.

Amazonas nunarsuarmi kiattup orpippassuaqarfiisa annersaraat. Tamatuma ilaa Boliviamiippoq. Tamaani uumasut naasullu assigiinngitsut amerlasoorujussuupput. Kiattulli orpippassui ulorianartorsiortinneqarput silap pissusiata allanngorneranit. Amazonasimi panernersuaqarpoq, orpippassuit ikuallattarput qarsutsineqartarlunilu. Aamma orpiit killorneqartarput. Tamanna Boliviami nunap inoqqaavinut pinngortitamik inuussuteqartunut Amazonasimiittunut nunaannarmilu najugalinut kingunerluttarpoq. Taakkuullutillu nunami piitsuunerpaat ilaat.

Bolivia nunani inuit pisuut piitsullu atukkatigut naligiinnginnerpaaffiisa ilagaat. Siumukarpulli. Kisianni innuttaasut pingajorarterutaanit amerlanerusut piitsuupput. Meeqqat amerlasuut atuarunnaartarput imaluunniit klassi uteqqittariaqartarlugu.

AtuaRaketimi Delia aamma Carlos illoqarfimmi El Altomiittut tusagaqarfigissavagut. Tamaani kuuk paqqersimavoq, nillerneratalu kingunerisaanik naatsiiassat ajutoorsimapput. Boliviami nunap inoqqaavisa ilaanneersoq Jorge Luis Amazonasimi naapipparput. Amazonasimi piratfiskinik aalisartarpoq qaqqortarissanillu katersisarluni. Aamma Carlito atuarfimmini orpippassuit uumasullu qanoq illersorneqarsinnaanerannik ilinniartooq naapipparput.



Atuarluarisi

Line Gørup Trolle,
Hele Verden i Skole



TIMMISARTUMIK ATUARAKET BOLIVIAMUKAQATIGIUK



Kangerlussuarmiit silaannakut toqqaannaq La Pazimut – Boliviami illoqarfiit pingaarnersaasa aappaannut – 11.000 kilometerinik isorattussuseqarpoq.



LUIS ALFREDO



JORGE LUIS



LISETH



CARLITO



DELIA AAMMA
CARLOS

Bolivia Amerika Kujallermiipqoq. Nuna Kalaallit Nunaata affaatut angitigaaq. 25 millionit miss. innuttaqarpoq. Bolivia nunap timaaniipqoq sineriaqarani. Nuna qaqqaqarpoq, qatsinner-sarsuaqarluni, kiattup orpippas-suaqarluni savanne-qarlunilu.



Amazonasip ilaa Boliviamiipqoq. Amazonas nunarsuarmi kiattup orpippas-suaqarfiisa anginersaraat. Tamaani nunarsuarmi tamarmi uumasut naasullu assigiinngitsut amerlanerpaat ipput. Amazonas – nunarsuarmi kuuit takinersaasa aappaat – tamaana kuuppoq.



Boliviami panernersuit qarsut-sinerillu nalaanneqartarput. Amazonasimi orpiit killorneqartarput kiattullu orpippassuini ikualatto-qartarluni. Tamatuma kinguneri-sarpaa ilaqutariit ilaasa nuuttariaqalernerat.



Boliviami nunap inoqqaavi assigiinngitsut 36-t najugaqarput. Naggueqatigiit amerlanerpaat tassaapput aymarar aamma quechuat. Naggueqatigiit ilaat 2 millioniusarput – ilaalli hunnorujut arlalialuinnaasarlutik. Nunap inoqqaavi amerlasuut Amazonasimi najugaqarput.





CARLITO

CARLITOP KIATTUP ORPIPPASSUI ORPIILU NALUNNGEQAI

📖 LISE JOSEFSEN HERMANN 📍 JUAN GABRIEL ESTELLANO SCHULZE

Carlito qaqqortariarujussuarmik tigumiarpoq. Qaqqortariaq paranøddeq. Taanna kiattup orpippassuini orpinni portusuuni naasarpoq. Qaqqortarissat inerikkaangamik namminneq nunamut nakkartarput. Qaqqortariarpassuarnik katersisarpoq. Qaqqortarissat puunut ikiorarneqartarput.

Carlito 7-inik ukioqarpoq. Ataatani Juan Carlos, anaanani Valeriana, najanilu Alexa 4-nik ukiulik illoqatigai. Illoqarfeeqqami Batrajami najugaqarput. Illoqarfeeraq kiattup orpippassuini Amazonasimiippoq.





Carlito qaqqortarissat ineriikkaangata feeriarparpoq. Decembarimiit februaarimut. Anaanani ataatanilu motorcykelerlutik kiattup orpippas-suini ilorpartertarput. Tamanna kiaqaaq isugutaqaluni ippernaqaqalunilu.

Qaqqortarissanik katersineq ulorianartarpoq. Oqimaaqim-mata nakkarfigitinnissaq mianersornartaqaaq.

Ukiut ilaanni qaqqortari-aqarpiarneq ajorpoq. Siallerpiarsimangikkaangat kiappallaarlunilu qaqqortarissat naangitsoortarput.



Carlitop kiattup orpippassuini orpiit naasullu amerlasuut atii nalunngilai. Illoqarfeerarmiu orpippassuarni atuarfeqarput. 2. klassimi atuartuuvoq. 5 minutsi pisulluni atuariar-tortarpoq.




Atuaqatigiit akulikitsumik orpiit akornanni atuar-tarput. Carlitop ilinniartitsisuata sooq orpippas-suit paarilluartariaqarnersut nassuiaattarpai. Orpiit nungullugit piiarneqassanngillat. Taa-maattoqarpat kiappallaalissaag. Aamma ilinniar-paat orpiit sorliit illuliarineqarsinnaanersut.



Carlitop atuaqatai ungasissumi najugaqarput. Carlitop ullumikkut sanilertik Denis pinnguaqatigaa. Denis 3. klassiuvoq. Kuummukallattaasarput. Kuup naqqa ersingilaq. Imeq taaqimmat ersigisarpaat.

Aamma attortaattarput. "Toco, attorsinnaangilarma!" Denis suaartarpoq. Toco Carlitop taaguutigaa. Mikigallarmat arnaata taama aqartarsimagamiuk. Boliviami kikkut tamangajammik aqaatiminnik taaguuteqarput. Allaat inersimasut.



Carlitop Alexa aamma il-loorartik pinnguaqatiginerusarpai. Illooraat Esneiberimik ateqarpoq Gorditomillu taaneqartarluni. Alexa Esneiberilu sisamanik ukioqarput. Billeeraneq toqqortaannerlu pinnguaatiginerusarpaat.

Carlito erruillattaasarpog aalisakkanillu saliisuusarluni. Aalisakkat eqqaminni kuummi pisarisarpaat. Carlitop nerisassiorneq nuannarisaraa. Kisianni ataataata anaanaatalu uunialeqimmat ilaanikkuinnaq akuerisarpaat. Inuuimmini saaliaqummik tunisippoq. Neriuppoq akulikinnerusumik nerisassiorlissalluni.





Carlito ilinniagassalerineq nuannaraa. Taava susassaaleqineq ajorpoq. Matematik nuannarinersaavaa. Atuarfimmi Anaanap ulluanut piareersarput. Pappiaqqanik kusanartuliorput. Anaanaminut tunniunnissaa qilanaareqaa.

Carlito qaaqusaasimavoq. Nardielyp inuiani atuaqatigiit tamarmik qaaqusaasimagamik nuannisassamaaqaat.



Filmit assillu nittartakkami takusigit. Carlito ulluinnarni sulerisarnersoq atuarfialu takusinnaavasi.

HELEVERDENISKOLE.DK/CARLITO





ORPIIT OQARIARTUUTAAT

📖 METTE VEDSØ 🎭 KATHRINA SKARŐSÁ

Oqaluttuaq Qisunnguakut naatsiivianni aallartippoq.
Orpigaaluit aappaluttunik paarnallit eqqaanni.
Paarnai seernartut Qisunnguup mamarinerpaasai!

Ullorli taanna arlaannik allanngortoqarpoq. Nerrivik
nutaaq. Kajortoq kusanartooq – orpigaaluit saavannut
pisimavoq. Qisunnguup saneqqutileramiuk naani
ilummoortippai. Nerrivik sakattoorpa.

“Nar’ aa,” oqarpallappoq.

Qisunnguaq tupaqaaq.

Eqqani qinerpa. Nerrivik tuerlu naatsiivimmiittut
eqqaassanngikkaanni allanik eqqaaniittoqanngilaq.

“Aloo,” oqarpallappoq.

Uuh! Nerrivinguna oqaluppalluttoq.

“Peqeriarlutit ataanut pulaniarit,” oqarpallappoq.

Qisunnguup uummatimi kassuppallunna tusaasinnaavaa.

BUM BUM BUM.





“Ungasissorsuarmit
aggertuugama tipera allanarpa?”
Qisunnguaq tangajorpoq. Immaqa chilit,
kaffit imaluunniit mangot melonilluunniit

tikki?

“Orpippassuarmiuunera naamaneqarsinnaavoq.”
Qisunnguaq nerrivik nalligilerpaa. Angerlarsersi-
massaaq. Taama misigineq nammineq nalunngeqaa.
“Siullermik pilattorlunga kipivaannga. Taava
nerrivinngoriarlunga tunivaannga,” oqarpallappoq.
“Taamaattoqarsinnaanngilaq!” Qisunnguaq oqarpoq.
“Maanna maaniippunga. Qiianaqaaq aamma
angerlasimaffinnut ungaseqaaq.” Manittorpoq.



“Tusaariassasutilli!” nerrivik oqarpoq. “Uagut orpiit pikititsissaagut! Angerlarniarpugut. Orpippassuagut annaattariaqarpagut.” Nerrivik oqaluttuassaqaqaaq kiattup orpippassuatoqarsui, kusanartumik qaqortumik putsertarnerat, naasui orpiilu portusuut, pukkitsut, sungaartut, aappaluttut qorsuillu pillugit. “Taavali motorsavipalaat takkupput,” nerrivik oqarpoq. “Orpippassuit narsaatingorput. Narsaatit kusanaatsunik mikisunik naasullit.” “Hajjaa, taamaattoqarsinnaangilaq,” Qisunnguaq oqarpoq. “Tassa taamaattoqarpoq,” nerrivik oqarpoq.





Taava Qisunnguaq nipimik tusaasaqalerpoq. Saannguani anaanaata isigai nuipput.

"Illorusaarpit? Imminut oqaluuterujoorpit?" aperivoq.

Sikippoq. "Nerrivik nutaaq ilaa kusanaq?"

Qisunnguaq ataaniit anillappoq.

"Unnugu aggerina. Ikiussavarma. Unnugu!" nerrivik isussuppoq.

Aap, unnugu, Qisunnguaq eqqarsarpoq.

Pilu pissarsiaraa.

"Unnuaru ikiortariaqarparma," oqarpoq. "Pingaaruteqaqaaq."

"Suna? Qanoq? Sooq?" Pilu akivoq.

Qisunnguup nerriviup oqaluttuai tamaasa oqaluttuari.

"Ila ajoraluassusia," Pilu oqarpoq. "Nunarsuarput aserorterparput."

"Kisianni nerrivik oqarpoq ... pikititsissallutik!"

"ILUMUT?" Pilu oqarpoq. "Uanga aamma piareeqqavunga!"





Qaammatigeqaaq. Ikinngutigiiit nerrivik sikkilinit
ilillugu ingerlappaat.

“Umiarsualivimmut,” nerrivik oqarpoq.

Nuileriallaraq.

Umiarsuaq takisoorsuaq aallaliivissoq.

Umiarsuaq useqangaarmat ilungersoqalutik nerrivik
qaqippaat.

Umiarsuup qaavani qisuut orpiillu taamannaanaq.

“Meeqqat-aa qujanarujussuaq,” oqarpallapput.



Sapaatip akunnera qaangiummat Qisunnguup Pilullu tv-imi ilanngutassiaq takuaat.

“Nassuiaatissaqanngitsumik kiattup orpippassuisa orpii angerlarsimapput,” angut oqarpoq. “Umiarsuaq ullaag tikippoq. Orpinnik qisunnillu ulikkaarluni. Taamaattoqarnera orpiit angerlarusunerminnik silarsuarmut oqariartuuteqarnerannik taamaallaat paasineqarsinnaavoqt.”

Qisunnguaq qungujuppoq. Taava anaanaq matu naatsiiviup tungaanut ammarpaa.

“Naak nerrivipput?” aperivoq.
“Ilaa naammita?” Qisunnguaq oqarpoq Pilumut qungujulluni.



**ATUFFASSISUT
AMAZONASIMI
BOLIVIAMIU
OQALUTTUATOQAATAAT.**

MOTACÚMIK BISOSIMILLU OQALUTTUAQ

 OQALUTTUAREQQIISOQ LINE GØRUP TROLLE  NIS BANGSBO

Boliviami kiattup orpippassuini motacópalmerpassuit naasarput. Palminut immulluni orpik silittumik kanaartalik naasarpoq. Orpik bibosimik taaguuteqarpoq. Orpinnut allanut immulluni taamaallaat naasinnaavoq motacúpalmillu naaffiginerusarlugit. Bibosip sorlai ataani nunami siaruartarput. Palmit immuigalugit talliartortarpoq. Naggataagut bibosip sorlai toqusarput seqernullu qinngorneri motacúpalmimut immuivigisimasaminut anggussinnaajunnaartittarlugit, taamaaalillutillu orpiit marluullutik toqusarput.

Boliviaviami kiattup orpippassuini ilorpasissumi najugallit oqaluttuatoqaateqarput. Boliviami oqaluttuaatit nalunnginneqarnerit ilaat. Motacúmik Bibosimillu oqaluttuaq.

Qangarujussuaq angut inuusuttoq nukittoq suleruluttorlu Bibosimik atilik inuusimavoq. Arnamat Motacúmut atilimmut asannilersimavoq, taannalu Bibosimut asannilerluni.

Arnalli angajoqqaavinit paasineqarput, taakkulu aappariinnerat iluarinngilaat. Taakku angummik panimmik uissaanik toqqaareersimapput. Arnalli

*angummut allamut katinnginnermini asasani
naggammik takoqqaarusuppaa.*

*Unnuaavoq. Aliasoqalutik qiaatigalutik
oqaloqatigiipput. Angutip ingerlannginnermini
arnaq pakkuppaa. Pakkussinera sakkortungaarmat
marluullutik toqqutigaat.*

*Orpiit bibosit motacúpalmillu siulliit asaqtigiit
toquffianni imminnut immullutik naasimapput.*





LISETH

LISETHIP NAATITANI KAKAOIT MAMARINERPAASARAI

📖 LISE JOSEFSEN HERMANN 📍 JUAN GABRIEL ESTELLANO SCHULZE

Lisethip eqeersarluni talini siaarpai. Ataataata su-aqqippallappaa. Arfineq-marlungorpoq. Makippoq. Iggavimmi imeq kuutseriaraluarpa, kuseriarninngua-milluunniit soqanngilaq. Aamma! Taava anaanaa motorcykelerluni kuuuqqamut imertartariaqassaaq.



Liseth qulingiluanik ukioqarpoq. El Senami najuga-qarpoq. Illoqarfeeraq Amazonasimiippoq. Tamaani 35 gradenik kiattuaannangajappoq.

Ataataata Liseth atuarfimmu ingerlattarpaa. Aqqutaani ullaakkorsiutis-sanik pisisarput. Liseth 4. klassiuvoq. Corona pequtugalugu sapaatip akunneranut pingasori-arluni arfineq-pingasuniit ullup-qeqqata tungaanut atuartarpoq.



Atuarfimmu soraaraangami anaanani Damary ullup-qeqqasioqatigisarpaa. Anaanani suliffini pillugu oqaluttuaraangat nuannarisarpaa. Damaryp inuit orpippassuarnik uumasunillu paarsillu-arnissaannik ilinniartittarpai.

Lisethip ataataa Rufinomik ateqarpoq. Ania Ricardiño 11-nik ukioqarpoq. Angajua Rashel 12-inik ukioqarpoq. Aamma aqqaloqaraluarpoq. Taanna ukiup ataatsip siorna ajutoornikkut toqunikuuvoq. Lisethip maqaaseqaa.



Kakaoi orpiup kanaartaani naasarpoq.


Ilaqutariit kiattup orpippassuini nerisassamin-
nik naatitsivigisartakkaminnik naatsiiveqarput.
Bananit maniokillu naatittarpaat. Maniok naa-
titaavoq.

Lisethip kiattup orpippasuini naatitat mamareqai.
Kakao mamarinerpaasaraa. Lisethip angaa naat-
siivimmi orpiuteqarpoq kakaoeqartartumik. Liseth
angujunilu alussaammik kiliuillutik kakaoimik
tigusisarput. Immulerlugulu sioraasalertarpaat.
Ilaanni kakao kissartog unukkorsiutigisarpaat.



Jurikan Lisethip kammaginerpaasaraa. Lisethip Jurimik taasarpaa. Periarfissaqarnerit tamaasa cykelertarput. Liseth cykeleqangimmat Jurip cykelini atortittarpai.

Anaanaata Liseth pisiniartittarpaa. Pisiniaraangami blokki kaajallaqqaartarpaa. Cykelerneq nuannarinerpaasaraa.



El Senami imissaaleqipput. Lisethikkut illuat ullormut akunnerit marluk imeqartarpoq. Ullup sinnera kuunnguamut imertartariaqartarput. Imeq illumik sanianiittumut nappartamut kuisarpaat. Imeq iseriakujukkaluarluni imerneqarsinnaavoq.

Tamaani El Senami paneqaaq pujoralallunilu. Motorcykelerpassuaqarpoq. Siallertarnera annikillinikooqaaq. Maannalu El Senami najugallit amerlinikooqaat. Inuit 2.500 illoqarfeeqqami najugaqalernikuusut imermik amigaateqarput. Siornatigutuut siallertigineq ajorpoq.



Ilaanneeriarluni Lisethip anaanani suliarortoq ilagisarpaa. Anaanaata motorcykelianik ingerlasarput.

Lisethip kiattup orpippassuiniinneq nuannareqaa. "Orpiit killorneqaqqusaanngillat. Silaannaq orpinniit pivoq. Aamma uumasut orpippassuarni najugaqarput. Naasullu nakorsaaitut atortakkavut tamaani pisarpagut," Liseth oqaluttuarpoq. Orpippassuit nakorsaatissaminnik aallertarfigaat.

Lisethip takorloorpaa anaanamisut suliaqalerumarluni. Naasut allallu kingunissaannik inunnut tunioraasarusuppoq, anaanani taamaaliortoq takunikuuaa. Taava tamarmik naatitanik nakorsaatinillu pissaqassagaluarput.



Filmit assillu nittartakkami takusinnaavasi. Lisethikkunni Jurikanilu kakaoiliortut takusinnaavasi.

HELEVERDENISKOLE.DK/LIETH



MEEQQAT ATUARAKETIMIITTUT BOLIVIALU PILLUGIT PAASISAQARNERUGIT



Ukioq manna AtuaRakettip Boliviami meeqqat alakkarpai. Nittartakkami meeqqat nunalu najugaat pillugit paasisaqarnerusinnaavutit. Jorge Luis naatitanik paananillu katersisoq aamma Delias Carlosilu qaqqami qatsinnersarsuarmi najugaat, Liseth pinngortitap qanoq paarineqarnissaanik Carlitolu qaqqortarissanik katersisoq takusinnaavasi. Luis Alfredop kiattup orpippassuini illoqarfissuit ilaat Riberalta takusinnaavat.

Atuarfik takusinnaavat, aamma assassorluni suliaasat pinnguaatit spilillu paasisassarsiorfigisinnaavatit. Kiisalu Bolivia oqaluttuassartaa aamma pinngortitaq uumasullu alutornartut paasisaqarfiginerusinnaavatit.



[HELEVERDENISKOLE.DK/TIL-ELEVEN](https://heleverdeniskole.dk/til-eleven)



NUNAT ANGUNIAGAAT

FN-ip piujuartitsinissamik ineriartortit-sineq pillugu nunanut anguniagai 17-it ataatsimoorluta nunarsuatsinnut anguniagaraagut. Anguniakkat 2030-ertinnagu angussagatsigit suliaasaqaqaagut. Taamaammat sulii useqartariaqarpugut allannguillutalu.

AtuaRaketimi oqaluttuarineqartut nunat anguniagaasa ilaannik unaminartunik imaqarput. AtuaRaket 2022-mi nunat anguniagaat arfinillit ukioq manna immikut ukkatarissallugit toqqarsimavagut.

Piitsuussuseq, atuartitaaneq, suaassutsit naliigissitaanerak, naliiginnginneq, silap pissusia aamma qanoq nunarsuup paarilluarneqarnissaa pillugit paasisaqarnerusinnaavutit.



[HELEVERDENISKOLE.DK/VERDEN SMAALENE](https://heleverdeniskole.dk/verdensmaalene)



SAPAATIP AKUNNERA SUNNIINARFIK/AKTIONSUGEN: NUNARSUARMI MEEQQAT TAMAASA ATUALERTITSIGIT

PEQATAAGISI

ULLORMI PISUSSAT
MALINNAAVIGISINNAAVASI
UANI HELEVERDENISKOLE.
DK/AKTIONSUGEN-2022

TAAMAALIOQQILERPUGUT

2022-mi Aktionsdageqaqqilerpugut – ulloq sunniinarfik – aatsaallu taama pingaaruteqartigaaq. Nunat anguniagaasa 17-it 2030-mi angunissaannut ukiut arfineq-pingasunnangorput. Aamma nunat anguniagaat 4 – meeqqat tamarmik pitsaasumik atuartitaanissamik piginnaatitaaffeqarnerannik imaqartoq. Ukiut arfineq-pingasut ingerlapallassapput. Meeqqat sinneruttut 58 millionit atuartunngortissavagut. Aamma ilinniartitsisut amerlanerulertariaqarput. Taamaammat sap. ak. 17-imi sunniiniassaagut.

Ukiut 19-it atuartut Oxfam IBIS peqatigalugu sunniiniartarput. Erinar-sorlutik, qitillutik, oqalugiarlutik kortinullu allallutik politikerit oqalut-tuuttarsimavaat meeqqat tamarmik atuartuunissamik pitsaasumillu atuartinneqarnissamik piginnaatitaaffeqartut. Iluaqutaanikuvoq, maanna nunarsuarmi meeqqat quliugaangata qulingiluat atuartuuserput. Sulili nunat amerlasuut corona ajornartoorutigaat. Taamaallutillu sulii ikiorneqarnissamik annertunerusumik pisariqartitsillutik.

PEQATAAGISI

Ullut sunniinarfiusartut oqaluttuarineqarnerat filmi assinilu takusinnaavasi. Ulloq sunniinarfissamut programmi takusinnaavat uani: heleverdeniskole.dk/aktionsugen-2022

Udviklingsministeri Flemming Møller Mortensen
Christianshavns Skolemilu 6. klassit 2021-mi
ullormi sunniinarfimi.



KATERSINIARNEQ:

BOLIVIAM I MEEQQAT ATUARTUNNGORNIS- AANNUT IKIORSIGIT

Boliviami meeqqat meeqqatut allatuulli pitsaasumik atuarfeqarusupput. Kisianni atuakkat, allattaaviit, aqerluusat anitsiarnermilu pinnguassat amigaatigaat. Bolivia coronamik eqqugaanikooqaaq. Atuarfiit nunarsuarmi corona peqqutigalugu sivisunerpaamik matoqqasimasut ilagaat. Atuarfiit piffissap affaa ammasaleqqinnikuupput, sulimi coronartoqarmat. Taamaammat meeqqat toqqisillutik atuassagunik sulikiinnamut assiaqutit spritserutillu pisariaqartippaat. Katersat atuakkanut, allattaavinnut, allaatinut, nipilersuutitut, arsanut, pissittaarutitut pinnguaatinullu atornerqarumaarput. Pisariaqassappallu aamma qaqorsaatinut, qanermut assiaqutitut spritserutinullu.

Namineq qanoq katersuiniassanerlusi aalajangissavarsi

Meeqqat nunarsuarmi nunani assigiinngitsuniittut ikiorniarlugit atuartut Hele Verden i Skole katersiniarnerani ukiorpaalunngortuni ikiortarnikuuaat. Titartakkat kaagillu tuniniarlugit katersisoqartarnikuuvoq. Atornikuerniarluni sapaatillu akunnera aalajangersimasumik sammisaqareernermi naggasiutitut aggersaalluni tuniniaasoqartarnikuuvoq. Tamakku qujassutigisaqaagut massak-

kullu aamma katersiniartarnisi nuannersut pisariaqarteqqilerpagut.

Plakatiliarpur anillatseriarlugi atorsinnaavarsi katersiniarnermi iluaqutaassamat. Plakatimi mærkinik ikkussisarlusi katersinersi malinnaavigisinnaavarsi.

Katersat tamarmik iluaqutaassapput. Neriuppugut ikiuutilaarsinnaajumaartusi.





RHODA JENNIFERILU ATUARTUNIT ALLAGARSIPPUT


Atuartorpasuit Rhodamut
Jenniferimullu AtuaRaket
2021-miinnikunut allassimapput.
Nittartakkami allagarsiassatik
tigugaat takusinnaavasi.



**HELEVERDENISKOLE.DK/
POST-TIL-RHODA-OG-JENNIFER**



**KORTIT TIGOREERSI-
MASSAVAGUT ULLOQ
1. JUUNI 2022**



LISETHIMUT LUIS ALFREDOMULLU ALLAKKAT

Ukioq manna Lisethimut Luis Alfredomullu allassinnaavusi. Kusanartunik titartagartalerlugit allaffissalionsinnaavusi muminganullu allallusi. Lisethip Luis Alfredollu paasisinnaanias-sammasi pitsaanerussaag spaniamitut allakkussi. Spaniamitut oqaaseqatigiit allattukkagut atorsinnaavasi, uaniipput heleverdeniskole.dk/send-post-til-laeserakettens-boern-2022

Allakkasi Hele Verden i Skolemut nassiutissavasi, taava uagut Lisethimut Luis Alfredomullu ingerlateqqissavagut.

Allakkat uunga nassiutissapput:

Oxfam IBIS
Vesterbrogade 2B, 2. sal
1620 København V
Att: Hele Verden i Skole

**ERSARISSUMIK
ALLAKKAT
QASSIUNERSUT
KIMUKARNERSULLU
ALLAKKISIGIT.**



**JORGE
LUIS**

JORGE LUISIP PIRATFISKIT MAMAREQAI

 LISE JOSEFSEN HERMANN  JUAN GABRIEL ESTELLANO SCHULZE

Kanomi mikisumi Jorge Luis ataatanilu issiapput. Nipaaqaaq. Kuuk qorsummik qalipaaticilik nakkuppaat. Aalisaataat aalariarpoq. Aalisagaq katannginniassammat aalariarniariartoq amuapallattariaqarpoq.



Jorge Luisip aalisarneq nuannareqaa. Piratfiskerniarneq nuannarinersaavaa aamma mamareqigamigit. Kisianni kuummi nalussagaanni sissuertariaqarpoq. Piratfiskit angisuunik ipittunik kiguteqarput. Niut assaalluunniit kiisinnaavaat kilerlugit. Aalisakkamik angisuunik nukittuumillu pisaqaraanni aalisaat kanolu tiggummilluartariaqarput. Taamaaliunngikkaanni nusutsilluni kuummut nakkartoqarsinnaavoq. Qujanartumik Jorge Luis suli nakkarnikuunngilaq. Nalunngisaqarporli nakkarsimasunik.

Qullugissat neqitarisarpaat. Neqitarigaangamikkitt aalisakkanik angisuunik pisaqartarput. Aalisakkat pacút, paichet aamma suribit. Taaku Amazonasip kuuini uumasuppuput. Maannali Jorge Luisip ataataata meeraagallarneratuulli aalisagaqartiginngilaq. Aamma massakut aalisakkat mikinerulernikuuppuput.



Jorge Luis anaanaa Angela, ataataa Walter nukaalu Walter Dilo illoqatigiipput. Qatannugutai angajullit namminneq najugaqalernikuupput.

Maani naggueqatigiit cavineñot naalagaapput

Jorge Luis canineñovoq. Nunap inoqqaavi taakku 2.000 missaaniipput. Namminneq oqaaseqarput. Jorge Luisip cavineñot oqaasii atorlugit oqaaseqatigiit amerlanngitsut oqaatigisinnaavai, ataataa anaanaalu oqallorinnerupput. Ulluinnarni spaniamiut oqaasii atorpaat.


Jorgi Luis mikigallarmat kiattup orpippassuini ilorpasinnerusumi illoqarfeeqqami najugaqaraluarput. Ilaqutariit arfineq-marluk. Ataataa oqaluttuarillattaasarpaa. Taamani eqqissisimanaqaaq orpeqarnerulluni uumasornerullunilu.

Maanna maani Buen Destinomi najugaqarput. Illoqarfiup qeqqatigut kuuk amitsoq kuuppoq. Illoqarfinnut allanukassagaanni kanomik kuukkut ingerlasariaqarpoq. Maani biileqanngilaq. Amerlanerit pisuinnartarput. Marluk motorcykeleqarput. Nersussuit atuarfiup eqqaani ivigartorusaartarput.

Illoqarfik naggueqatigiit cavineñot najugaqarfianniippoq. Tamaani namminneq aalajangiisuusinnaapput. Orpiit sorliit killorneqassanersut aalajangertarpaat. Aamma sorliit pilattoqquusaannginersut. Kisianni ilaanni avataaniit tikittoqartarpoq. Taakku orpinnik killuisarput piniariartarlutilluunniit – apereqqaanngiivlutik. Taamaaliortut Jorge Luisip ataataa ajoreqai. Assigiinnarpaa tillinneq. Tassami nuna tamanna cavineñot pigivaat. Nunali annertoqimmat nakkutiginiarneq ajornakusooqaaq.

Cavineñot pinngortitamut qanillutik inuupput. Qaqqat, imeq orpippassuillu. Aamma uumasut nujuartarpassuit pingaaruteqaqaat. Tamaaniipput puulukit nujuartat, bæltedyrit, tapirit aapakaallu. Jorge Luisip ataataa ilaanni orpippassuit ilorpasissuanut angalasarpooq. Nipiliortoqaraangalli uumasut nuannarineq ajorpaat. Ataataa oqaluttuaraa nipiliortoqaraangat pulateriaarsuit ersisaarisartut, uumasut eqqissillutik orpippassuarniinniassammata.

Amazonas nunarsuarmi kiattut orpippassuini anginersaavoq. Tamaani orpiit gummissallit aamma bananeqartartut naasarput. Orpiit paranøddeqartartut takinerpaanut ilagaapput.





Jorge Luis ullaakkut ualikkullu puilasuliamut imertartarpoq.

Imeqanngilaq sarfaqaranilu

Ilaqutariit illuat imeqaranilu sarfaqanngilaq. Jorge Luis ullut tamaasa puilasuliamut imertartarpoq. Nukkani ingerlaqataagaangat nuannarinerusarpaa. Aamma aalisarneq nuannareqaat.

Maani Buen Destinomi kiaqaaq aamma ippernaqaaq. Ingammik ullaakkut qaammalernerani taarsilerneranilu ippernaqartaqaaq. Ualikkut Jorge Luis Walter Dilolu qasulertarput uernalerlutillu.

Jorge Luisip saniliminnut pulaarluni nuannarisarpaa. Taanna generatoreqarpoq fjernsyneqarlunilu. Tassani meeqqat inersimasullu illoqarfeerarmiut ataatsimoorlutik fjernsynertarput. Generatori motoriuvoq benzina atorlugu sarfaliortoq. Benzina akisuvoq. Buen Destinomi inuit ikittuinnaat generatoreqarput.

Atuarfik mikisoq

Atuarfiat Jorge Luisikkut eqqannguanniittoq aamma sarfaqanngilaq. 6. klassiuvoq. Atuarfiuvoq immikkuullarissiq. Matematik immikkut sammingaatsiartarpaat. Ilinniartitsisuata oqarfigisarpai atuarfiup naammassinissaa pingaaruteqartoq. Jorge Luisip meeqqat arlallit atuarunnaarnikuusut nalunngilai.



Jorge Luisip matematik nuannarinersaavaa. Angisuunngoruni kukkumersiusunngorniarpog. Nalunngilaa taava kisitsisinik assut suliaqartassalluni. Kisianni Buen Destinomi ilinniarnertuunngorniartefeqanngilaq. Ilinniagaqarniaraanni illoqarfimmut angisuumut Riberaltamut nuuttari-aqarpoq. Jorge Luis taamaaliorusuppoq.

Paranøddet naatsiivillu

Jorge Luisikkut illuata saavaniippoq orpik angisuunik mamartunik grapefrugtilik. Anaanaata taakku mamartumik juiceliarisarpai. Kiattup orpippassuisa ilorpassisuanni naatsiiveeraqarput nerisassanik naatsivigisartakkaminnik. Akunnerup affaa pisullutik tassunnartarput. Tassani majsit, bananit, maniokkit sorlaat suaasallu naatittarpaat.



Ilaqutariit grapefrugtit nutaat mamareqaat. Ualikkut kiatsikkaangat alannumiinneq iluartaqaaq.



Paranøddet kokositut angitigaat. Iluaniittarput kingunissat marluk nerineqarsinnaasut.

Jorge Luisikkut aamma paranøddenik katersisarput. Taakku kiattup orpippassuini orpinni naasarput. Ilaanni akunnerit pingasut pisoqqaarlutik orpiit taakku tikittarpaat. Qaqqortarissat oqimaaqimmata portusuumiillu nakkartarmata nakkarfigitinnaveersaartariaqarpoq. Niaqqukkut tuffigiteriasaarnissaq ulorianaqaaq. Oqimaaqigamik toqussutaasinnaapput.


Paranøddet decembarimit februaarip tungaanut inerittarput. Piffissami tassani Jorge Luis atuangiffeqartarami katersinermut ikiuuttarpoq.

Sialuk amigaatigaarput

Nunami maani ukiup nikerarneri marluupput – siallersarnera panerreqartarneralu. Ukiut tamaasa qarsutsineqartarpoq. Ukiunili kingullerni siallertarnera annikinneroqaaq kiannerulernikuullunilu. Taamaammat paranøddenik naasoqarpiarnikuunngilaq. Ukioq manna ilaqutariit paranøddet katersortakkamik affaannai katersor-sinnaasimavaat. Taava paranøddenik ikinnernik tunisaqaramik aningaasarsissutigerpiangilaat.

Amazonasip orpippassuini ikuallattoqartaqaaq. Orpinnut, uumasunut kuummullu ajoqutaaqisumik. Aalisakkat paarnat orpinnit nakkartut nerisaraat. Orpiit ikuallakkaangata aalisakkat nerisassaat amigalertarput. Kuummi aalisakkat millisarput ikilillutillu. Jorge Luis neriuppoq ukiup tulliani aamma piratfiskinik aalisarsinnaajumaarluni.

Nalunngilaa kiattup orpippassuisa paarilluarnissaat pingaaruteqartoq: "Orpiit uatsinnut pitsaasuupput. Taakkuuppummi silaannarmik najuus-sukkatsinnik pilersitsisut." Ilaqutariit pinngortitaq kinguaariippassuit najorsimasaat inuussutigisimasaallu paarilluarusuppaat.



Assit filmillu nittartakkami takusigit. Jorge Luis Amazonasip kuussuani aalisartoq takusiuk Boliviamilu nunap inoqqaavi pillugit paasisaqarlusi.



SUNA TAMAMI SIORAANNANGORMAT

 SØREN JESSEN

Oliver kuummi paqqersimasumi issiavoq sioqqanilu assaalluni. Assataminut isikkani pulateriarlugit sioqqanik matoorpai. Assaalluni malunnarpoq sioqqat ilorpasinnerusut nillernerulaartut. Allaangilaq takanani isugutak suli amiakkoqartoq. Ullutsinni isugutak qaqutiguungaarmat maanngaannartinneqarsinnaangilaq. Kuuk imeerunniukuvoq, naasuerunniukuvoq, aalisagaarunniukuvoq suminermilluunniit uumassuseqartumik suerunniukuvoq. Oliver kisiivimmi tamaani ippoq. Kiaguppoq, kiagunninilu malugisinnaa-gamiuk suli uumasimavoq. Nalunngilaa inuit toqungasut kiagunneq ajortut. Ukiup ingerlanerani inuit toqungasut amerlasuut takunikuai.

Seqernup inngianarnerata kiaallu ipiaanngunarnerata suli sioqqanut pulatinnerulermani anersaartorniarnera erloqinarsivoq. Avatangiisit uumassuseqartutut inngillat, Oliverilli uummataa suli kassuppoq. Aanaava oqarnikuuvoq uummat kassuttoq malugisinnaatillugu neriummik peqartuaannartoq. Suna neriuutigalugu?? Siallernissaa? Taanna neriuut qangali allat peqatigalugit parngunnikuuvoq. Sumulluunniimmi iluaqutaanngilaq arlaannik eqqutinngisaannartunik neriuuteqarnissaq. Sumummi neriuut iluaqutaassava? Niaquani kaavittutuat tassaapput kiak, sioqqat imerusunnerlu. Ilumut qasunaq! Ulloq taanna suut tamarmik ajortinnerat eqqaamaqqissaarpaa. Ulloq taanna suna tamarmi sioraannangormat. Oliver atuarfimmii ikinngutinilu Alfred angerlamut ingerlapput. Aqqusinikkut ingerlarujoorput, najugaqarfiat eqqissisimasumiippoq, illutai orpigaaqqanik ungalulinnik naatsiivillit. Qorsooqqingaarmat aqqusinermi fliset akunnerisigut naasut allaat puttuttarput. Oliverip Alfredillu illui 400 meteriinnarnik imminnut ungasissuseqarput. Imminnut utikaffingaarmata aqqusinermi aqqutikunissimassapput. Sunngiffitsik tamangajaat qarasaasiakkut spilertarput. Siullermik arsaattarnikuugaluarput. Massakkut taamaallaat ilaanneerlutik FIFA spilertarput.

Ulloq taanna aamma sivirusallaamik spilerput. Oliverip arnaa arlaleriarluni angerlaqqusilluni allappoq, spilimik killiffiat pikkunarsisorlu allattarami. Spileriar mataasiit piffissaq sukkasoorujussuarmik ingerlasimavoq. Ulloq taanna spilimi inuttat naalagaat pisariliiveruttorpaat. Taassuma inuunera 4 %-iinangoqqasoaq ... taava anaanaa sianerpoq. Tigusariaqarpaalu, tamannalu spilikkaminni toqqutigaat.

Tujuuluaraa kamippaasalu singii erfapput. Singini asuli piffissaajaatiginiannnginnamigit – qilerussaaqittussaagamigillu qilerneq ajorpai. Ulloq taanna kiaqimmat qarleeraqarpoq, tujuuluaraqarluni teqqialeqarlunilu. Aasarissuuvoq kiaqaluni – sivirusuumik taamaanikuulluni. Kiannersua ingasaqaaq, naak ulluklut Alfredikkuniikkaangamik sikutortaluarlutik kiaguttaqaat.



Sila arpaffigissallugu kiakkaluaqisoq anaanani kamappaloqimmat arpappoq. Imaassinnaavormi kiagoqaluni iseruni iluaqutaassasoq. Taava anaanaata takusinnaassavaa tuaviorluni angerlarsimasoq.

Qanoq perianngitsoq seqineq nuissanit asserneqarpoq. Oliver tupaallalluni qummut qiviarpoq takullugulu qilak aapillersimasoq. Soorlu ualikut seqineq tarrileraangat ilaanni taamaattartoq. Eqqumeequtigaa sulil ualinnngimmat taamaalineranilu aapillerneq ajormat. Suugaluarnersoq tippitut taartutut isikkulik killingusaamiit nuiartuaarpoq. Eqqumiitsorujussuaq.

Anoraasuariasarnerata orpiit aalatippai. Oliverip suenera malugaa. Allaanngilaq anaanaata nutsanut panersaataanik eqqortilluni. Sioqqanik perserpoq. Sioqqanik issippoq aamma kigutini kiigamigit oqummersisimalluni malugisinnaavaa. Arpaannaq angerlamut iseriartorpoq. Ataataa, anaanaa, aanaa najaalu nerissallutik issaareersimapput.

“Qilak takuisiuk!” suaartaannaq oqarfigai. “Taarsivoq aapillerlunilu. Seqineq orangeanngooqqavoq!”

“Ingeriarlutit neriniarit,” arnaata sukangalluni oqarfigaa.

“Sooruna taama kingusinaartigaat?” ataataa aperaaq.

Oqaatsiniukua paasinnginneraat? “Anorersualilerpoq!” Oliver nilliavoq.

“Taamaattoqanngilaq, anorersuup kujaqquterujussuassavaatigut. Maanna ingeriarlutit nereqatiginiartigut!” ataataa oqarpoq.

Taamaalisorlu anoraasuaq sakkortuumik takkuppooq illu neeqqulutsillugu immiartorfiillu skaavimmiittut igalaaminerpalutsillugit. Naasulivik imaqqanngitsoq igalaap saavaniittoq nakkarpoq qanngorinnarmillu sequmilluni. Tamarmik tupangaraamik qisuariarput.

“Sunaana!” ataataa nikuiitigaluni oqarpoq. Tamarmik igalaanukarput.

Taarsivoq sioqqanillu persilerluni.

Oliverip isikkani sioqqaniit amuai, kuuaqqami paqqersimasumit maannalu sioraannaasumit nikuippooq tuaviinnarlu illukup alannguanukarluni. Illut amerlanerit aserornikooqaat amerlanerillu sioqqanut morsussimapput nuisalaarlutilluunniit, taakkulu illukut alanngui pinngitsoorneqarsinnaanngillat. Kinaluunniit ulloq naallugu



seqernup saqqarsimasaani annassinnaanngilaq. Ingammik massakkut erngup pissarsiarinissaata ajornakusoornerujussuata nalaani. Ilaanneeriarluni biilit imermut tankillit takkuttarput. Taava dunkialuit – sipaaqaluni atugassanik – imermik immerneqartarput. Uffarnissamut imeq amigarujussuarpoq. Imeq tamaat nerisassiornermi imigassatullu atorneqassaaq. Allamuunngitsoq. Oliverip oqaa allaanngilaq sioqqanik qallersimasoq. Imertariaqalivikkami tuaviinnaq angerlamut aallarpoq. Soormiuna aamma kuummi paqqernikumi alanngooqanngilluinnartumi issiasimasoq? Taamarsuaq sianiillioqqissanngilaq. Inuppasuit eqqarsaqaarsimannginnertik peqqutigalugu qilallutik kissappallaarsimallutillu toqunikuupput.

Alfredikkut illuat saneqquppa. Igalaavi tamarmik aserorsimapput sioqqanullu morsungajassimalluni. Illup affaa kisimi nuisalersimavoq. Eqqaamiuisa illui tamangajammik taamaapput. Inuerussimapput, aserorsimallutik sioqqanullu morsungajassimallutik. Alfred ilaqtannilu allarpassuit assigalugit avannamut qimaanikuupput. Ilaqtariit amerlanngitsut kiserngorunnikuupput. Tamarmik arlaannik peqquteqarlutik uninngaannarsimapput. Oliverip aanaava – ungasissumukarnissaminut nukissaqanngimmat – anaanaata ataataatalu qimakkusunngilaat. Aallaqatiginiassagamikku pitsannguuminissaa neriuutigalugu uninngaannarnikuupput. Kisianni suli pitsannguumingilaq.

Maanna ilaqtariit kiserngorussimasut ataqatigiinniarsaripput. Ikioqatigiillutik nerisassarsiortarput sioraajaasarlutillu. Sioqqalli qanoq pineqarsinnaangillat. Ullaat tamaasa anorimit sioqqanik qattuninngortoqarsimasarpoq. Tulliani sumut pissanersut eqqoriarneqarsinnaaneq ajorpoq. Inuit ilaat ungaluliorsimagaluarpoq, taakkuli atangaangillat. Sioqqat anorillu suut tamaasa uppikaatittarpaat.



Oliver angerlamut apuukkami naqqup ataanukapallappoq. Maanna tassani najugaqarput. Nillerneruvoq sioraqannginnerullunilu. Naqqup ataani anartarfeqarpoq, uffarfeqarluni igaffeqarlunilu, taakkuli imeqanngikkaanni tamarmik atorsinnaangillat. Suli kallerup inneranut attaveqarput kisianni internetteqanngillat. Inersimasut oqartarput suli innaallagiaqarnera tupinnarluinnartusoq. Qularinngilaat taamaalluni innaallagiaarutissallutik, tamannalu assut siooragaat.

Oliverip sioraninggikkallarnera eqqarsaatigaa, taamani aasakkut Alfredilu ullut tamaasa sikutortarput. Maanna ukiumut ataasiaannarluniluunniit qanorluunniillu akeqaraluarpat sikumik ataasinguamik perusukkaluarpoq. Ilaanneeriarluni sinnattortarpoq ilaqtanilu avannamut nuullutik, namminerlu Alfred nassaaralugu. Iteraangamili naluneq ajorpaa taama pisoqanngisaannassasoq, naluaammi Alfred ilaqtanilu maanna sumi najugaqarnersut. Aallarmatali sunnguamilluunniit tusarfigeqqinngilaat.

Oliverip najaa Emma nalaasaarfimmi issiavoq qialluni.

“Susoqarami?” Oliver aperivoq.


“Aanaa ...,” qianermik oqarsinnaanngilaq.

“Aanaa sugami?” Oliver nilliaannaq aperivoq.

“Aanaa ..,” oqarniarsarigaluarpoq qianeruliinnarlunili.

Oliver tupannermik qerattaannarpoq. Upperisinnaanngilaa.

Aanaami piffissaq kingulleq pitsaanerulaalernikuuvoq. Angajoqqaanilu nipikitsumik oqaluuttut tusaanikuai imaassinnaasoq aanaa avannamut ingerlanissaminnut erniinnaq nukissaqalissasoq. Oliver Emmap sanianut ingippoq. Asuliinnarsuaq isugutammik katagaajumanani qianaveersaarpoq. Qulliili kuulerput.




Oliver ilaqtutanilu ilaqtariillu allat ilisarimanngisatik biilit kinguata usisarfiani ilaapput. Erloqinartumik kiappoq tattoqisaannarlunilu, nappartaaluimmi imermik imallit, nivaatat karsillu assigiinngitsunik imallit aamma tassaniipput. Usisarfia igalaaqanngimmat sumut ingerlanerlutik takusinnaanngilaat. Oliverip ataataata angutillu ilaaqataata biilinik ingerlatsisut tatiginngilaat. Tatiginarpasinngitsuupput, qitequtiminni illuinnarsuuteqarput. Allanuku ajutooqqanerat iluanaarniutigipilukkaat, anaanaa oqarpoq. Avannamut ingerlanneqarneq akisoorujussuuvoq. Aanaap pinnersaatai tamaasa akiliutigalugit ilaapput. Taamaaliortariaqarnertik anaanaata aliasuutigeqaa.

Motorvejini ingerlaffigisaanni asfalti kiassuarmik aqillutsissimavoq. Aqqusernit sukkut tamaana quppanitsitersimapput,

maniilakulunnersanillutik puttoortiterlutillu. Aqqutigisaminni sioqqat aqqusinnermut teqqarsimasarmata marrittoorfigisarpaat. Marrikkaangamik niullutik nivattarput, aquttut biilini issiaannartut.

Kigaatsumik ingerlanerminni Oliverip aanani eqqarsaatigiinnavip-paa. Takoqqinngisaannartussaanaera upperisnaanngingajappaa. Aanaava oqartarpoq siunissaq pitsaanagerusumik isumalluarfigissassaa-soq. Avannaa isumalluarnarnerusoq tamarmik nalunngilaat, soqar-nersorli ilisimannngilaat. Oliverip nalunngisatuaraa sioqqat tappavunga anngussimanngitsut. Immaqa Alfred takoqkeriasaarsinnaavaa? Imma-qa eqqaamioreeqqilersinnaapput? Immaqa pulaaqattaateqqilerunik utikajaarnermik aqqusinnermi aqqutikuneqqissinnaapput? Tamakkuup-put Oliverip neriuutai, sulilu uummatini kassutsillugu qanorluunniit pisoqarsinnaanera neriuutissaraa. Aanaava taama oqartarpoq.





**DELIA &
CARLOS**

SILAP QANOQ INNISAA NAATSORUMINAAPPOQ

 LISE JOSEFSEN HERMANN  JUAN GABRIEL ESTELLANO SCHULZE

Delia Carlosilu arsaaffimmiipput. Tamaanngaanniit ungasissumut isikkiveqarpoq. Qaqqat nuui aputillit. Kujammut kangimut qaqqaq Illimani takusinnaavaat. Avannaaniippoq Huayna Potosí. Qatanngutigii El Altomi najugaqarput. Illoqarfik qatsissumiippoq. Tamanna narsaaqaq naak immamit 4 km-inik qatsitsigisumiikkaluarluni. Qatsissup silaannaanik panertumik silaannaqarpoq. Carlos Delialu tamaani najugaqaramik silaannaa sungiusimavaat. Tikeraalli qasujatsittarput, ipiaangeqqajaalerlutik uissanngusarlutillu. Allaaqqeqimmat seqernup qinngorneri sakkortupput.

Delia 15-inik ukioqarpoq Carlos 12-inik. Allani arfineq-marlunnik qatannguteqarput. Taamaammatt pinnguaqatissaarutissanik aasortugassanilluunniit amigaateqarneq ajorput. Illunnguanni El Altomi avalliulluni inissimasumi susoqartuaannarpoq. Illuat avalliugami nunaannarmiittutut misinnangajappoq. Delia Carlosilu anaanartik ataartik, Roxana Genarolu najugaqatigaat. Deliap angajuni ineqatigaa. Carlosip nukappiaqqat ineqatigai.



Nillernerata naatsiianik naatitsineq ajutoortippaa

Deliap Carlosillu angajoqqaavi nunaannarmeersuupput. Suli tassani nunaminermik pigisaqarput. Naatsiianik quinoanilluunniit ikkussuiartorlutik tassunnartarput. Ilaanni angajoqqaavi qaammat tassaniittarput. Taava qatanngutigiiit qulingiluut namminneertarput nerisassiorneq isumagisassallu allat namminneq suliarisarlugit. Taamaaligaangat Carlosip anaanani ataatanilu maqaasisarpai: "Maaniinngikkaangata kisimiittutut misigisarpunga naak qatanngutikka tamarmik maaniikkaluartut."

Naatitsiniarneq imaannaangilaq. Ukiup ingerlanerani silap allanngortarneri pisarnermissut inngillat. Qaqugu siallingaatsiassanersoq imaluunniit issilissanersoq siumut naatsorsorneq ajornarsinikuuvoq. Bolivia juuni, juuli aggustilu ukiuusarpoq. Ukiorti kingulleq februarimi issilerpoq. Taamaalimmat naatsiianik quinoanillu naatitsinerit ajutoorput, Genaro oqaluttuarpoq. Maanna naatsiianik nerisassaminnik pisisariaqartarput namminneq naatitaminnik soqannginnamik. Taavalu angajoqqaavi sulinerusariaqalerlutik nerisassanut atugassaminnik aningaasarsiniassagamik.



Boliviami nunap qatsissortaani naatsiiat issimut panertinneqartarput. Taava asiunatik sivisuumik pigineqarsinnaasarput. Taaneqartarput chuños. Ilaqutariit ullup-qeqqanut naatsiiat, naatitat manniillu nerikulasarpaat.



Carlosip Chica piaraalu pinguaqatigai. Biilnik last-biilinillu titartaaneq nuannareqaa.



Carlos qimmillu

Carlos 7. klassimi atuarpoq. Ingeniørinngorusuppoq, taava ikaartariit angisuut aqqusernillu sanasassavai. Aamma palasinngorusussinnaavoq. Naalagiarneq erinarsornerlu nuannareqai.

Carlosip qatanngutini arsaqatigalugit nuannareqaa. Tassa amerlasuujulluni qatanngutiginnerup nuanneqataa.

Carlos atuarfimmiit soraaraangami Chica ornipallattarpaa. Chica ilaqutariit qimmiisa ilaat. Sisamanik piaqqeqqammivoq. Qimmiaqqat paarisagattaartarpai. Tamarmik anaanaminni milunnersut nakkutigisarpaa. Inequgisorujussuai. Qimminik paarsilluni ikiuuttarpoq.



Delia nerisassiornermut erruinernullu ikiuuttarpoq. Aamma qatanngutini piffissaqarfigisarpai.



Deliap nutaarsiassat malinnaavigai

Ullaat tamaasa atuariannginnermini Deliap nuannarisarpaa biibilimi atuarneq. Ilaqutariit upperluartuupput. Igaanni biibilimik issuaalluni allatat nivingapput. Ilaqutariit sisamanngornermi unnukkut sapaammilu ullaap tungaa naalagiartarput. Deliap oqaluffiup eqqissinarnera iluarisarpaa.

Delia 9. klassimi atuarpoq. Atuarfia 15 minutsi pisulluni orninneqarsinnaavoq. Atuarfiani atuartut 180-iupput. Atuarfik nutaajuvoq ukiut pingasut matuma siorna sanaaq. Allami atuarfeqarnikuupput. Deliap inunnik ikiuineq nuannarigamiuk kigutitut nakorsanngorusuppoq. Aamma nunamut allamut takornariarnissani takorloortarpaa. Canada-miumik allaqateqartarnikuuvoq. Nuna angisooq qianartorlu pillugu atuarluni nuannareqaa.

Atuarfimmit angerlaraangami angajunilu nutaarsiassat tv-imi isiginnaartarpaat. Ilaanni nutaarsiassat allattortarpai. Nutaarsiassalerisup ullumi oqaluttuaraa arnat amerlasuut nakuuserfigineqartartut. Tamanna Boliviame ajornartorsiutaavoq. Angutit ilaasa arnat naleqannginnerusutut isigisarpaat. Taamaanneq taaneqartarpoq machisimo-kultur.

Kingulliullugu nutaarsiassalerisup præsidentiusimasooq oqaluttuaraa. Evo Morales nunap inoqqaavini siullersaalluni præsidentinngornikuvoq. Naggueqatigiinnit aymaraneersooq. Deliap tamanna allappaa.

Naggueqatigiit aymara

Delia Carlosilu aamma aymaraapput. Boliviame inuit 2 millionit oqaatsit aymarat atorsinnaavaat. Ilaqutariit tamarmik taama oqaluttarput. Deliap aymarat qiteriaasai nalunngilai, taakku ukiut tamaasa karnevalertoqarnerani qitittarpaat. Aymarat arnartaasa atequtaasa tujuuluisalu immikkuullarissuunerisigut takuneqarsinnaasarput.

Delia, Carlos qatanngutaallu Freddy UNO-nik unammisut.





Kuuk paqper-
nikuungaarmat
kuuffikua
pisuffigineqar-
sinnaavoq.

Ilaanni anaanaata aymarar ileqqulersuutigisartagatoqaanik oqaluttuutarpai. Sava pilliutigineqartarsimavoq aava nunamut kuutsillugu. Taamaaliortuni naatsitsilluarsimanermut Nunarsuaq Anaana qutsavigineqartarsimavoq. Napparsimasoqaleraangat angakkoq ornineqartarsimavoq. Angakkup kokat pilutai atuariarlugit qanoq iliussanersut oqaluttuuttarsimavai.

Kuuk paqqernikoq

Delia Carlosilu El Altomi kooqarallarmat eqqaamavaat. Kuummi nerisassaminnik aalisakkanik pisaqartarnikuupput. Maanna kuuk paqperluinnaleroq. Kuuk Rio Secomik taasarpaat, isumaqartoq kuuk panernikoq. Kuummi aalisagaarunnikuuvoq.

Angajoqqaavinut suliffimmik nassaarniarneq ajornakusooqaaq. Genaro sanaartornermut atortussanik sanaartorfimmi sulisarpog. Kuumminngaanniit imeq atorlugu sioqqat salittarpaat. Sioqqat cementimut akuliussassat. Imeq ippannikoq kuummut kuuteqqittarpaat. Genarop nalunngilaa taamaaliorneq kuummut pinngortitamullu iluanngitsoq, kisianni suliffeqartariaqarami allatut ajornaqaaq. Ingammik massakut naatsiiarnek naatitsinerup ajutoornerata nalaani.

Deliap Carlosillu siunnissap qanoq ikkumaarnera naluaat. Kisianni neriupput kuuk imeqaleqqikkumaartoq tullianilu naatsitsineq iluatsikkumaartoq.



Filmit assillu nittartakkami takusigit. Deliap Carlosillu nunarsuarmi illoqarfeeqqat qatsinnersaanni najugaat takusiuk.

**HELEVERDENISKOLE.DK/
DELIA-OG-CARLOS**



ILLIMANIMIK, ILLAMPUMIK, HUAYNAMIK, POTOSÍMIK MURURATAMILLU OQALUTTUAQ

 OQALUTTUAREQQIISOQ LINE GØRUP TROLLE  NIS BANGSBO

Boliviami qaqqarsuit Andesit pillugit oqaluttuartaqarpassuaqarpoq. Unalu qaqqat portunerit sisamat pillugit oqaluttuaq tusaamasaanerit ilagaat.

Qangarsuaroq guuti Viracocha aalajangerpoq ernini sisamat Qaqqarsuarni Andesini eqqisseqatigiillutik naalagaassasut. Taakkuli sisamat ilaat ataaseq naalanngitsuuvoq. Muraratap tamaasa naalagaaffigerusuppai. Qatanngutini pingasut sorsuffigai. Sorsunneq ukiuni tuusintini ingerlavoq.

Viracochap sorsunneq takisooq qatsuppaa. Malitsini aalajaatsoq Tunupa eqqisseqatigiinnissamik atajuartussamik suliakkerlugu aallartippaa. Tunupa ilumoortuuvoq naapertuilluartaullunilu. Angutit tamaasa isumasiorpai. Tunupa aalajangerpoq angutit pingasut kisimik naalagaaginnassasut. Illampu – qaamanermut naalagaasoq, Illimani – imermut naalagaasoq Huayna Potosílu ujaqqanut naalagaasoq.

*Mururata silaannarmut naalagaavoq.
Taanna Tunupamit toqumik pilla-
gaavoq. Niaquerneqarpoq. Niaqua
kisimi qaqqap qaaniilerpoq.
Taanna innermik
anitsartunngorpoq
Sajama. Taama-
nenniilli qaqqaq
taanna inngeqanngit-
soq taaneqartalerpoq
Mururata.*

OQALUTTUATOQAQ
BOLIVIAMÍ
QAQQARSUARNIT
ANDESINEERSUUVOQ.





**LUIS
ALFREDO**

KIATTUP ORPIPPASSUISA QEQQANNI ILLOQARFIK

📖 LISE JOSEFSEN HERMANN 📍 JUAN GABRIEL ESTELLANO SCHULZE

Amazonas nunarsuarmi kiattut orpippassuisa annersaraat. Orpiit ilaat sanileriingajallutik napasut gummitræt palmillu portoqaat. Kuuit sangujoraarput, silaannaq isugutasoq sullinernik ulikkaarpoq. Orpippassuit ilorpassisuanni jaguarit, kuukkooriarsuit timmissallu uumasuupput.

Amazonasimili aamma illoqarfeerarpassuaqarpoq illoqarfeqarlunilu. Illoqarfiit ilaat ateqarpoq Riberalta. Tassani inuit 100.000 missaat najugaqarput. Illoqarfik kiaqaaq motorcykelinillu ulikkaarluni. Taxaat aamma motorcykeliupput. Aqqusineq angallattunik ulikkaarami imminnut siggartaatiinnaq angallattarput. Aqqusernup sinaani tuniniaasunik ulikkaarpoq. Atisat, naatitat, ullup-qeqqasiutissat suulluunniillu atortussat pisiarinqarsinnaapput.

Luis Alfredo 11-nik ukioqarpoq. Illoqarfimmi avalliullutik anaanani, ataatani, najani angajunilu marluk najugaqarput.



Atuakkanik atuarneq nuannernersaavoq

Kukkukooq angutiviaq qarlorpoq. Luis Alfredo itereersimavoq. Illumik tunuanni orpinni naatsiivinnilu timmiaaqqat qarlorpaluttut tusaasinnaavai. Arfineq-marlunut nammineerluni itertarpoq. Atisalersoriarluni kaffisortarpoq iffiaortorlunilu.

Taava atuariartortarpoq. 15 minutsit pisulluni aqqusinikkut aappaluttunik ujaraaraalikkut atuarfimmukartarpoq. Atuarneq nuannarinersaavaa. Oqaluttualiat nuannareqai. Silarsuaq pillugu ilikkagaqarnartarpoq, soorlu pinngortitamut avatangiisinullu tunngasunik.

Ullup-qeqqanut sianeraangat Luis Alfredo soraartarpoq. Angerlartarpoq ullup-qeqqasiortorlunilu. Masaso mamarinerpaasarai. Bananit immussuarlu atorlugit nerisassiaq. Siariarlugit aserorterneqartarput. Ilaanneeriarlunilu aamma colamik tunisittarpoq.

Luis Alfredo 5. klassimi atuartuuvoq. Ullumi atuaqatigiit matematikkerput.



Luis Alfredo ananami pisiniarfia nakkutigiitigalugu titartaavoq.

Ualikkut siniffimmini nalarpoq fjernsynerlunilu. Filmit ersinarlut nuannarisarpai aamma nangeqattaartuliaq Toretto. Isiginnaanngikkaangami ananami mobilia atorlugu spilertarpoq.

Ullumi aleqakkuni pulaarniarpai. Qujanartumik ilaqutartaanilu ungasinngitsuani najugaqarput. Luis Alfredop meeraanik paarsilluni ikiuuttarpoq. Meeqqat mikisut pinnguaqatigalugit nuannarisarpaa.

Riberaltami piitsuussuseq ajornartorsiutaaqaaq

Luis Alfredop najugaqarfia isumannaatsumi inissisimangilaq. Illut qisunnik sanaat mikisuupput. Ilaat saviminernik saattunik qaliaqarput. Inuit amerlasuut illoqarfeeqqaniit Riberaltamut nuussimapput, suliffittaarnissamik meeqqamillu atuarnissaannik neriuuteqarlutik. Illoqarfimmili suliffissarsiniarneq ajornakusooqaaq.

Luis Alfredokkut najugaqarfianni inuit amerlasuut imigassamik imaluunniit ikiaroorartumik ajornartorsiuteqartuupput. Allaat ilaanni Luis Alfredo imigassartorusunnersoq ikiaroorusunnorsoruunniit aperineqartarsimavoq. Kajungerinngilaali. Isumaqarpoq ikinngutit ilumoortut tamakkuninnga ussiiniartartussaangitsut.

Luis Alfredo aamma nalunngisaqarpoq meeqqanik tillittartunik. "Assersuutigalugu iipilimik imaluunniit aqerluusamik tilliffigitikkuit, pitsaaneruvoq utertinngikkukku. Taakkumi atorfissaqartissimassavaat," Luis Alfredo oqarpoq.

Luis Alfredop aleqaata najugaa. Pulaarusuleraangamiuk orniinnartarpaa.



Luis Alfredo, anaanaa Adela, ataataa Jorge najaalu Rihana 9-nik ukiulik.

Ilaqutariit tamaani ukiut pingasut najugaqarsimalerput. Siullermik illoqarfiup ilaani allami illumi pitsaanerusumi najugaqarsimagaluarput. Taavali anaanaa napparsimalerpoq, sivisuumillu sulisinnaasimanani. Napparsimavimmi uninngasariaqarsimavoq suliaritillunilu. Napparsimavimmiinneq akisoqaaq. Luis Alfredo atuarfimit anisariaqarsimavoq ataatanilu suleqatigalugu. Inuit allat narsaataanni sulisarsimapput. Taamaammat 3. klassi marloriarsimavaa. Luis Alfredop angajoqqaavi aamma anaanaata suliaritinnera akilerniarlugu paranøddenik katersisariaqartarsimapput.

Luis Alfredo aliasoqaaq. Anaanami toqunissaa annilaangageqaa. "Anaanat annaagukku soorlu tassa ilaqtattit tamaasa annaagilit. Kiserngorutivissaatit," Luis Alfredo oqarpoq. "Guutimut qinusarpunga anaanaga uanga allinissama tungaanut suli uummaannassasoq."

Luis Alfredo ilaqtattami aningaasaateqarpianginnerat kannguginngilaa. Allarpassuit suli atugarliornerupput, oqarpoq. Assersuutigalugu inuit ilai eqqaavinni nerisassarsiortariaqartarput.



Inuuneq unamminartunik naammattuugassa-qartuaannarpoq

Luis Alfredop ikinngutini ilagalugit nuannarisarpaa. Illoqarfimmi sikkileqattaartarput. Nammineq aamma sikkileqarnikuuvoq. Ilaqutariilli aningaasanik amigaateqalermata sikkilit tunisariaqarnikuuat.

Aammali Luis Alfredop kisimiinneq nuannarisarpaa. Taava illunik, oqaluffinnik naasunillu titartaasarpog, taallanillu atuartaqaluni. Taallaq nuannarinerpaasaa kolibrinut tunngasuuvoq. Aallaqqaatigaa: "Kolibri takkuppoq. Naasut aqqusaartorpai..." Titartaaneq atuarnerlu eqqissisimanarisaqai.


Luis Alfredop titartaaneq nuannareqigamiuk ilusilersuisartunngornis-sani takorluugaraa. Ilinniagaqarusuppormi. "Neriuppunga piviusunngorumaartoq. Siunissarli nalunaqaaq. Inuuneq nalunartoqaqaaq, inuuneq unamminartunik naammattuugassaqartuaannarpoq," Luis Alfredo eqqarsarpasilluni oqarpoq.



Filmit assillu nittartakkami takusigit. Luis Alfredo kiattup orpippassuiniittumi Riberalta mut alakkarsiuk.

HELEVERDENISKOLE.DK/LUIS-ALFREDO





TOBOROCHI
ISUMAQARPOQ 'ORPIK
ILLERSORTI' IMALUUNNIIT
'QIMARNUIK'. ORPIK BAOBAB
ILAUTARAA.

ORPIMMIK TOBOROCHIMIK GUUTIMILLU KOLIBRIMIK OQALUTTUATOQQAQ

 OQALUTTUAREQQIISOQ LINE GØRUP TROLLE  NIS BANGSBO

Qanga silarsuup pinngoqqaarsimalernerata nalaani taartup anersaavi Anamik taaguutillit inuusimapput. Inunnik toqutsineq nuannarisuusimavaat ajortorsuullutillu.

Kunngi Ururuti paneqarsimavoq Araverámik atilimmik. Taassuma kunngi Kolibri katissimavaa. Araverà naartulersimavoq.

Taartulli anersaavisa paasisimavaat Araverá ernertaassasoq. Erneratalu inersimasunngoruni pillaanissaa annilaangagilersimavaat. Taamaattumik Araverá toqunnialersimavaat.

Kolibrip Araverá kingunissamik silaannakkoorsinnaasumik tunisimavaa. Kingunissamiilluni anersaat ajortut qimarratigisinnaasimavai. Ajortulli malersortuaannarsimavaat. Sumulluunniillu toqqoraluaraangat nassaarisarlugu.

Qimaajuarneq qatsukkamiuk orpimmut toborochimut toqqorsimavoq. Tassani ernisimavoq. Orpimmi eqqissillutik inuupput. Ernerata perorami siulittuut eqquutsippaa. Anaanani inuunermi sinnera orpimmi inuusariaqalersimasoq akiuniullugu anersaat ajortut toqppai.

Araverá orpiup toborochip kanaartaata iluani iliveqarluni naassaangitsumik tassaniilerpoq. Suli ullumimut anersaava naasutut pinnersorsuartut saqqummertarpoq. Kolibrit naasumi tassani mitsimaneq nuannareqaat. Taamaallutik Araverá Kolibrilu peqatigeeqilerput.



QUJANAQ ATUAQATAAGAVIT

heleverdeniskole.dk-mi Bolivia nunallu
allat LæseRakettinip tikeraarnikuusai
pillugit annertunerusumik atuarsinnaavusi.



HELEVERDENISKOLE.DK/BIBLIOTEK



ATUARAKET 2021

Naqinnera siulleq
©Oxfam IBIS
ISBN: 978-87-7208-357-5

Atuakkiortut, titartaasartut assiliisartullu tunniussaannut qujanarujussuaq.

Immikkut qutsavigaagut Dorthe Nielsen aamma Alexander Bach
siunnersuinerannut naqqissuinerannullu.

Qujanaq Hempel Fonden aamma Arbejdernes Landsbank LæseRakettin
2022-p saqqummernissaanut naqiterneqarneranullu aningaasatigut
tapiissuteqarnerannut.



LæseRakettin aamma AtuaRaket 2022-p imai Oxfam IBISip akisussaaffigai
taamaalillutillu tunisisut aningaasaliisullu isumaannik ersersitsisuunatik.

Aaqqissuisut

Line Gørup Trolle aamma Emil Nielsen

Assit

Juan Gabriel Estellano, Hans Bach, Kyle Hinkson, Genesis Gutierrez,
Dominic Kango, Andreas Beck, Emmanuel Musuruka, Stefan Gamillscheg,
Eva Køngerskov, Mike Kolloffel aamma William Vest-Lillesøe.
Saqqaaani asseq: Juan Gabriel Estellano, 2021

Ilusilersuisoq

Peter Waldorph/peterwaldorph.dk

Kalaallisuunngortitsisoq

Kathrine Knudsen Broberg

Naqiterneqarfia

Specialtrykkeriet Arco A/S

Siammarterisoq

Ilinniartitaanermut Aqutsisoqarfik
Kissarneqqortuunnguaq 20
Postboks 1610
3900 Nuuk
Oqarasuaat 345000
www.ila.gl

Atuakkami titartaasut atuakkiortullu pillugit
paasisaqarnerorusinnaavusi uani
heleverdeniskole.dk/tegnere-og-forfattere-2022/



**OXFAM
IBIS**

CARLITO



UKIOQ MANNA ATUARAKETIP AMERIKA KUJALLERMUT BOLIVIALIAQATIGISSAVAASI

Bolivia Amerika Kujalliup qiterpiaaniippoq. Nuna Amerika Kujallermi piitsuunerpaat ilagaat – pisuut piitsullu inissisimaneri assigiinneqalutik. Boliviap innuttai assigiinngitsorpasuupput. Illoqarfinni, qaqqani, kiattup orpippassuini narsanilu najugaqartut. Sumiluunniilli najugaqaraluarunik amerlasuut nerisassaqarniarnertik, imissaqarniarnertik meeqqamillu atuarnissaannut akissaqassanerlutik ernummatigisarpaat. Aammali silap pissusia allanngortoq ernummataasa ilagaat. Tamannalu Boliviami innuttaasunut ernummataavoq annertoq.

LISETH



AtuaRaketimi atuarsinnaavasi Carlito angajoqqaanilu paranøddenik katersisut. Liseth anaanani orpippassuarnik uumasunillu paarsisoq ikioraa. Amazonasip kuussuani Jorge Luis piratfiskinik aalisartoq. Qatanngutigii Delia Carlosilu Boliviap qatsissuani narsami najugallit. Aamma Luis Alfredo kiattup orpippassuini illoqarfissuarmut Riberaltamiittoq malinnaavigisinnaavarsi.

JORGE LUIS



AtuaRaket aamma imaqarpoq titartakkanik oqaluttualianillu nutaanik atuakkiortut matumunnga atuakkamut allassimasaannik. Pissanganartuupput, piviusorsiorpalaarlutik tamarmillu immikkut silap pissusianut tunngasunik imaqarlutik. Oqaluttuatoqqanillu Boliviamersunik aamma atuarsinnaavasi.

DELIA & CARLOS



AtuaRaket atuarneratigut Nunarsuaq Tamakkerlugu Atuarnerullu/Hele Verden i Skole-llu peqataaffigineratigut meeqqat tamarmik atuartuunissamik piginnaati-taaffeqarnerannut ukkaseqataatitsivisi.

LUIS ALFREDO



AtuaRaket aamma LæseRaketten 2022 atuarluarisiuk!



OXFAM
IBIS



**UDENRIGS
MINISTERIET**
Danida